

GOUVERNMAN SESEL



PRENSIP SERVIS PIBLIK

Entrodwir par Minister Ladministrasyon ek Devlopman Mendev

Zilyet 2003

AVANPROPO

PLI BON SERVIS POUR SESEL

Konm parti nouvo langazman mon gouvènmàn avèk lepep Seselwa e plan-d-aksyon ki ti'n agree pandan sesyon vizyonnmàn ki ti konmanse an 2001, enn bann priyorite prensipal ki ti ganny deklare sete:

“Gouvènmàn i devret formil e promouvwar en nouvo kod konportman moral ki pou anforse san diskriminasyon, avèk sanksyon pour sa ki pa swiv.”

Nou'n donn nou langazman pep Seselwa pour donn zot pli bon servis e pour annan plis responsabilite dan lafason ki nou pran ka avèk bezwen lepep.

Travay dan servis gouvènmàn, e dan servis en pep i demann bann kalite ek lafors ekstra. I ekspekte de nou ki nou profesyonnel dan nou konportman, montre swen dan egzekisyon nou travay e pour konport nou lekor dan en fason ki apropriye pour kiltir ki nou ekspekte dan nou Servis Piblik. I osi nou devwar pour servi piblik dan en fason ekitab e responsab, irrespektiv ki nou lopinyon personnel e krwayans.

Pep Seselwa pa merit ekspekte mwens ki sa.

Pep Seselwa i ekspekte bann Minister ek Departman pour azir dapre lalwa ki'n ekri e dan lespri sa lalwa. Zot ekspekte ki desizyon ofisyel i pran dan en fason enparsyel e egal, ki larzan piblik i ganny depanse avèk sazes e ki propriyete piblik i ganny servi avèk responsabilite ek swen. Zot ekspekte ki konportman bann zofisye napa nanryen pour reprove e ki travay piblik i ganny fer konsyansyezman e avèk konpetans a tou moman.

I annan de rezon partikilye pour kod konportman Servis Piblik:

- ? Pour donn gidans Zofisye Piblik lo nivo konportman ki ekspekte de zot;
- ? Pour fourni en baz pour bann kod pli detaye ki anliny avèk bezwen partikilye bann Minister ek Departman endividyel, dapre zot sirkonstans.

Minister Ladministrasyon ek Devlopman Mendev i responsab pour devlopman lentegrite ek bann valer Servis Piblik e i bezwen fer sir ki sa kod i ganny revwar e revize an akor ek sa devlopman, e ki bann resours ki siport sa devlopman i ganny met an plas. Sa kod konportman i annan pour fer avèk lafason ki nou fer nou travay.

Mon kont lo sak Zofisye Piblik (sivil) pour siport bann prensip dan sa dokiman e pour swiv sa bann gid ki'n donner kan zot pe desarz zot bann devwar ek responsabilite.

France Albert Rene
PREZIDAN

KONTENI

Avanpropo par Prezidan Larepublik

Seksyon		Limero Paz
1.	Gid Zeneral pour bann prensip	1
2.	Lobligasyon anver Gouvernman	1
3.	Non-alinyman politik	1
4.	Partisipasyon Politik	2
5.	Komanter Piblik lo Polisi Gouvernman	2
6.	Difizyon Lenformasyon Ofisyel	3
7.	Raport Lofans Serye	3
8.	Performans travay	3
9.	Respe pour drwa lezot	4
10.	Lentegrite ek konfli lentere	5
11.	Kado, Rekonpans ek benefis	6
12.	Konportman personnel	6
13.	Lotorite Disipliner	6
14.	Lofans Disipliner	7
15.	Lofans Disiplin ki serye	7
16.	Mezir Disipliner	8
17.	Lofans Kriminel ki ganny soupsonnen	9

"Prensip Servis Piblik Sesel"

PAZ DERYER

1. Gid Zeneral pour bann prensip

Sa kod konportman i kouber tou bann regilasyon debaz kot i konsern kondwit Zofisye Servis Piblik e i ekspekte ki zot servi sa bann gid pour obzerv sa bann prensip:

- (a) Zofisye Servis Piblik i devret montre lentegrite ek profesyonnalism dan lobzervasyon zot lobligasyon anver gouvernman;
- (b) Zofisye Servis Piblik i devret desarz zot responsabilite ofisyel avek lonnekte, bonnfwa e efikasite, an respektan bann drwa piblik ek bann drwa lezot zot koleg.
- (d) Zofisye Servis Piblik pa merit met repitasyon Servis Piblik an kestasyon dan zot aktivite prive.

Sa bann prensip in ganny elarzi pour ganny "Prensip Servis Piblik Sesel" ki'n enkli deryer sa dokiman. Tou Zofisye Servis Piblik i a ganny en kopi sa kod e i ekspekte ki zot donn zot langazman pour obzerv li atraver zot sinyatir dan plas ki'n endike.

2. Lobligasyon anver Gouvernman

- (a) An gro, premye priyorite Zofisye Servis Piblik se pour enplimant polisi gouvernman, e dan sa, zot ganny ekspekte pour azir dan en fason ki ouver e onnet dan lizye piblik.
- (b) Zofisye Servis Piblik i annan en lobligasyon pour deservi bann bi ek lobzekitif ki'n mete par Minis ki ansarz zot. Lentere personnel oubyen aktivite okenn zofisye pa merit enterfer oubyen paret enterfer avek sa lobligasyon.
- (d) Responsabilite prensipal bann Minister, Departman ek zot bann sef Egzekitif in ekri dan Lord Servis Piblik. Enn bann responsabilite mazer bann sef Egzekitif i konportman zeneral son Minister oubyen Departman. Lezot responsabilite i enkli asiste dan formilasyon ek lenplimantasyon polisi Gouvernman. Dan sa bann responsabilite, Minis I sa dimoun ki bezwen fer fas avek piblik e osi lezot lotorite dan gouvernman, donk, Zofisye Servis Piblik i annan en lobligasyon pour servi zot Minis dapre lalwa, avek lentegrite e mye ki zot kapab.

3. Non-alinyman politik

- (a) Zofisye Servis Piblik i bezwen servi Gouvernman-di-zour atraver zot Minis ki'n ganny apwente. Zot bezwen fer sir, non selman ki zot Minister oubyen Departman i gard konfyans zot Minis, me osi ki zot etabli menm relasyon profesyonnel e enparsyel avek lezot Minis ki vini. Bi sa kalite konvansyon non-alinyman politik se pour asire ki servis piblik i kapab siport bon governans Sesel a long term, san lenteripsyon e avek konsistans.
- (b) Zofisye Servis Piblik i annan en rol byen etabli pour asiste dan devlopman ek lenplimantasyon polisi. Dan sak Minister, sa rol i kapab zwe dan diferan fason lo diferan nivo. I responsabilite Zofisye Servis Piblik pour donn zot Minis konsey onnet, enparsyel e konpreansif lo konsekans ki bann polisi partikilye i kapab anmennen, irespektiv si sa konsey i an akor avek pwendvi bann minis oubyen non.

- (d) Sepandan, desizyon final lo polisi i reste dan lanmen Minis e Zofisye Servis Piblik pa devret kasyet Minis okenn lenformasyon ki relevan. Zot pa merit sey met retar oubyen lobstak kan pe pran en desizyon, ni sey sabotaz oubyen enfliyans polisi Gouvernman negativman (leg: fer sorti lenformasyon ofisyel san lotorizasyon).
- (e) I kapab arive parfwa ki serten Zofisye Servis Piblik i kapab annan bann krwayans personnel tre for lo serten size ki an konfli avek zot devwar ofisyel. Dan bann tel sirkonstans Zofisye Servis Piblik i bezwen fer zot mye posibilite pour enplimant polisi gouvernman irespektiv ki zot pwendvi personnel. Se Minis ki annan responsabilite politik pour polisi Gouvernman. Letan ki Minis in pran en desizyon i devwar Zofisye Servis Piblik pour enplimant sa desizyon dapre lalwa, irespektiv si zot dakor oubyen non.
- (f) Dan ka kot Zofisye Servis Piblik i trouv zot lekor dan en sityasyon kot zot konsyans i met kontrent lo lafason ki zot desarz en lenstriksyon legal, zot merit diskite zot sirkonstans avek opsyon ki zot annan avek zot siperyer. Zot pa zanmen merit fer okenn keksoz pour evit oubyen sabotaz polisi Gouvernman.

4. Partisipasyon Politik

- (a) Koman sitwayen Seselwa, Zofisye Servis Piblik i lib pour partisip dan aktivite politik andeor ler travay e zot kapab pran responsabilite ofisyel dan nenport parti politik. Zot bezwen sepandan fer sir ki zot partisipasyon dan bann zafer politik pa met zot oubyen aparaman met zot an konfli avek zot devwar koman Zofisye Servis Piblik ki azir dan en fason ki politikman non-alinyen. Sa i enportan pour mentenir konfyans piblik e Ministeryel dan lenparsyalite konsey ki'n donner e aksyon pran par Zofisye Servis Piblik.
- (b) Zofisye Servis Piblik pa merit servi zot pozisyon pour lavansman zot pwendvi politik, ni pour en parti politik partikilye ni pour okenn dimoun partikilye. Zot pa merit servi zot lofis pour en azanda politik, oubyen pour promouvwar propagann politik. Aksyon disiplinier pou ganny pran kont Zofisye Servis Piblik ki servi zot lofis pour aktivite politik.

5. Komantè Piblik lo Polisi Gouvernman

- (a) Bann Minister ek Departman i kapab otoriz serten anplwaye pour reponn okenn demann medya pour fer komantè lo diferan laspe polisi Gouvernman, ouswa son lenplimantasyon e ladministrasyon par sa Minister oubyen Departman. Komantè ofisyel lo lapar Minister oubyen Departman i merit fer selman par sa anplwaye ki'n ganny otorize pour fer li.
- (b) Zeneralman Zofisye Servis Piblik i annan menm drwa lekspresyon ek lendepandans dan zot zafer prive ki lezot manm piblik. Sepandan, zot osi annan en devwar pour pa konpromet zot anplwayer oubyen Minister par komantè ek kritik piblik lo polisi Gouvernman. Zofisye Servis Piblik i devret fer sir ki zot kontribisyon dan okenn deba piblik oubyen bann diskisyon parey, i apropiye pour zot pozisyon e i konpatib avek sa bezwen pour mentenir en Servis Piblik ki non-alinyen. Zofisye Servis Piblik ki okip sa pozisyon sinyor oubyen ki travay pres avek Minis i bezwen egzers swen partikilye.

6. Difizyon Lenformasyon Ofisyel

- (a) Akt Sekirite Leta (State Security Act, 1977) ek Deklarasyon Sekre Ofisyel (Official Secrets Declaration) ki tou Zofisye Servis Piblik i bezwen sinyen ler zot ganny apwente, i definir difizyon lenformasyon ofisyel. I devret ganny note ki bann provizyon dan sa deklarasyon i aplik non selman pandan peryod ki sa zofisye i dan lanplwa me apre ki in kite travay dan gouvernman.
- (b) Bann Minister ek Departman i kapab etabli bann prosedir spesifik pour difizyon lenformasyon akondisyon ki zot pa an konfli avek bann provizyon sa lakt. Lenformasyon ofisyel i kapab ganny difize selman si i an akor avek sa bann prosedir e par zofisye ki otorize pour reponn bann demann pour lenformasyon. Dan tou lezot sirkonstans, Zofisye Servis Piblik i merit servi lenformasyon zis dan ka ofisyel e sa lenformasyon i merit ganny trete koman konfidansyel pour departman.
- (d) Zofisye Servis Piblik ki'n ganny otorize par zot departman pour donn lenformasyon ofisyel i devret egzers swen ek diskresyon dan laplikasyon bann prosedir departmantal. Kan zot dan dout, bann zofisye i merit rod gidans kot biro Prokirer Zeneral.
- (e) I pa akseptab pour Zofisye Servis Piblik servi oubyen devwal lenformasyon san lotorizasyon, menm avek lezot koleg dan departman ki pa bezwen konn sa lenformasyon. Irespektiv ki rezon ki zot fer li, bann anplwaye ki fer sa i trai konfyans ki met dan zot e afekte relasyon ki merit egziste ant Servis Piblik ek bann Minis. Depandan ka, devwalman lenformasyon san lotorizasyon i kapab anmenn aksyon disiplinier, e sa i enkli perdi zot travay.
- (f) Bann Minister ek Departman i bezwen fer sir ki tou anplwaye i okouran prosedir apropiye pour raport konportman koronpi, move ladministrasyon oubyen gaspiyaz resours piblik, e osi ki proteksyon bann lorganizasyon parey Oditer Zeneral ek Onmboudsmenn i ofer sa bann anplwaye.

7. Raport Lofans Serye

- (a) Bann sef Egzekitif i bezwen met an plas bann prosedir entern pour anplwaye, e pour piblik an zeneral ki okouran bann ka lofans serye e ki anvi devwal sa lenformasyon.
- (b) Lofans serye i enkli: lizaz fon ek resours piblik dan en fason koronpi, iregilye oubyen ilegal; konportman ki met an risk lasante piblik, lanvironnman oubyen lenplimantasyon lalwa (ki enkli prevansyon, lenvestigasyon e deteksyon lofans e osi drwa pour en zizman zis); konportman ki en lofans; oubyen konportman par Zofisye Piblik ki seryezman inapropriye

8. Performans travay

- (a) Zofisye Servis Piblik i merit fer zot travay avek konpetans ek efikasite e zot merit evit konportman ki kapab anpes zot efektif. Tou anplwaye, enkli Zofisye Servis Piblik, i anba en lobligasyon pour desarz zot responsabilite dan en fason apropiye.

- (b) Sa lobligasyon i enkli sa bann devwar swivan:
 - i. Pour obeir lalwa;
 - ii. Pour obeir tou lenstriksyon ki legal e rezonnab sorti kot anplwayer, dapre lenstriksyon;
 - iii. Pour fer travay ki'n donn zot avek konpetans ek efikasite;
 - iv. Pour evit konportman (tel koman lizaz lalkol ek drog) ki kapab en lanpesman dan performans travay;
 - v. Pour rod laprouvasyon avan rod en dezyenm louvraz e pour pa pran travay segonder ki, dan lopinyon anplwayer i kapab an konfli avek travay ofisyel;
 - vi. Pour pa pran okenn responsablite oubyen det lo lapar anplwayer san lotorizasyon.
 - vii. Pour, servi resours, fon ek propriyete departman avek swen e pour pa servi ouswa otoriz lezot pour servi sa bann resours dan okenn lot sirkonstans ki bann ki'n ganny otorize.
 - viii. Pour prezan dan travay amwen ki i annan lotorizasyon pour labsans;
 - ix. Pour raport okenn lenstans lofans serye avek lotorite apropriye;
 - x. Pour obzerv tou regilasyon lasante ek proteksyon dan travay.

9. Respe pour drwa lezot

- (a) Dan zot travay, Zofisye Servis Piblik i bezwen respe drwa lezot zot koleg ensi ki drwa piblik.
- (b) Tandiski zot responsab pour zot prop performans, Zofisye Servis Piblik i annan en devwar pour montre lezot zot koleg ek piblik, lakourtwazi ek respe, pour ede fer travay mars byen. Sa vedir ki i ekspekte ki Zofisye Servis Piblik i;
 - i. Evit konportman ki met son koleg dan kek detres oubyen danze,ouswa kontribye pour kree diskord ek lenteripsyon dan travay;
 - ii. Evite les relasyon dan landrwa travay afekte performans travay negativman;
 - iii. Respekte drwa bann endividi pour annan konfidansyalite ler pe travay ek lenformasyon personnel.
 - iv. Pa fer diskriminasyon kont okenn dimoun akoz son sèks, si in marye oubyen non, son kouler, ras, nasyonalite oubyen lorizin laz, lopinyon politik, si i travay oubyen non, langazman familyal, oriyantasyon seksyel, ras, dezabilite oubyen krwayans relizye oubyen etik (ethical).
 - v. Pa persekit oubyen servi lentimidasyon kont kliyan oubyen lezot son koleg;

- vi. Respekte kiltir tou koleg ek kliyan dan tou sityasyon ofisyel; e
- vii. Respekte drwa lezot pour reste dan en lanvironnman sen e sof, dan lizaz propriyete ek resours gouvernman.

10. Lentegrite ek konfli lentere

- (a) Zofisye Servis Piblik i devret fer zot travay avek lonnekte, enparsyalite e evit sityasyon ki kapab konpromet zot lentegrite e koz konfli lentere.
- (b) Enparsyalite ek lentegrite Zofisye Servis Piblik i zwe en rol santral pour mentenir konfyans piblik dan Servis Piblik. Zofisye Servis Piblik i bezwen azir touzour avek lentegrite personnel e zot aksyon i bezwen kapab sibir lenterogasyon piblik.
- (d) Zofisye Servis Piblik i merit non selman evit sityasyon kot zot lentere personnel i an konfli avek lentere Minister oubyen Departman me zot merit osi evit sityasyon ki donn laparans en tel konfli.
- (e) Piblik pa merit annan okenn baz pour krwar ki desizyon oubyen polisi pa ganny aplike parey pour tou dimoun. Zofisye Servis Piblik i merit obzerv prensip egalite ek enparsyalite dan tou laspe zot travay.
- (f) Zofisye Servis Piblik i devret evite fer okenn tranzaksyon ki kapab direktman oubyen endirekteman, konpromet zot travay oubyen repitasyon zot Minister/Departman ouswa Servis Piblik an zeneral, dan zot relasyon avek piblik, kliyan oubyen bann Minis. Sa i enkli okenn sityasyon kot en aksyon ki'n pran dan en kapasite ofisyel i kapab ganny war koman enfliyanse oubyen i aktyelman enfliyanse par lentere prive en endividi (par egzanp, si zot form parti direksyon sa lakonpanyen prive oubyen annan par dan sa lakonpanyen ki pe fer sa tranzaksyon avek, si zot ganny ofer lezot plas travay andeor Servis Piblik).
- (g) Piblik i bezwen annan konfyans ki fon piblik pa pe ganny servi dan lentere personnel okenn endividi dan okenn fason. Zofisye Servis Piblik i bezwen fer sir ki kan zot aste provizyon an relasyon avek zot travay, zot fer en bon zizman finansyel.

11. Kado, Rekonpans ek benefis

- (a) Zofisye Servis Piblik pa merit abiz zot pozisyon pour gen personnel. Zot pa devret ankouraz oubyen aksepte okenn kado, rekonpans oubyen benefis ki kapab konpromet oubyen ganny war pour konpromet zot lentegrite, lentegrite zot Minister/Departman ek Servis Piblik.
- (b) An zeneral okenn Zofisye pa merit aksepte en kado (i pa enportan ki son valer oubyen kalite) ki dan lizye lezot i met li anba en lobligasyon ek en lot dimoun oubyen lorganizasyon.

12. Konportman personnel

- (a) Zofisye Servis Piblik i merit evit angaz li dan okenn aktivite, ki swa i konekte avek zot travay oubyen non, ki kapab afekte repitasyon zot Minister/Departman oubyen afekte bon relasyon avek bann Minis, kliyan oubyen piblik an zeneral.
- (b) An zeneral, konportman personnel en Zofisye Servis Piblik ki pa enterfer avek son bann devwar ofisyel, e ki pa reflekte negativman lo lentegrite oubyen repitasyon Servis Piblik i pa konsern Minister/Departman ki anploy li.
- (d) Sepandan, kot aktivite prive Zofisye Servis Piblik i reflekte negativman lo Minister/Departman oubyen Servis Piblik an zeneral, Minister/Departman i annan en drwa lezitim pour enterfer. Bann sef egzekutif i kapab etabli bann standar konportman ki zot ekspekte avek bann Zofisye Servis Piblik ki reflekte partikilarite lanvironnman sa lorganizasyon.

13. Lotorite Disipliner

- (a) An akor avek Lartik 66 dan konstitisyon Sesel pouvwwar disiplinier lo bann dimoun ki ganny apwente dan Lofis Servis Piblik i reste avek Prezidan koman lotorite egzekutif.
- (b) Par anba nivo Egzekitif Sinyor dan Servis Piblik Prezidan in donn pouvwwar bann Sekreter Prensipal oubyen sef Departman pour annan lotorite disiplinier. Sepandan, avan egzekutif sa pouvwwar, bann egzekutif Sinyor i bezwen ganny konsantman sa Minis konsernen e zot bezwen konsilte avek Minis a sak fwa. Sa provizyon dan konstitisyon pa aplik pour Sef Ziz, Oditer Zeneral, Prokirer Zeneral, Onmboudsmenn ek Komisyonner Elektoral.
- (d) Kot i konsern nivo Sinyor ek Sef Egzekitif dan Servis Piblik, kontrol
- (e) disiplinier in ganny mete par Prezidan dan lanmen Minister Ladministrasyon ek Devlopman Mendev. Sa pouvwwar delege i bezwen ganny egzerse avek konsantman Prezidan.
- (f) Mentenir lord, disiplin e efikasite i en responsabilite mazer dan zesyon e Prezidan, Minis pour Ladministrasyon ek Devlopman Mendev, tou Sekreter Prensipal ek Sef Departman i merit pran aksyon disiplinier deswit kan i nesese.s

- (g) Dan ka kot in annan lofans disipliner, prosedir ki merit swiv e sanksyon ki merit aplike i definir dan Lord Servis Piblik (PSO). Sa de seksyon ki swiv i donn bann detay zeneral lo bann lofans disipliner ek bann sanksyon ki a dispozisyon bann lotorite disipliner.

14. Lofans Disipliner

En anplwaye i komet en lofans disipliner kan i pa desarz bann lobligasyon an koneksyon ek son travay san en rezon valab, e pli partikilyerman kan sa anplwaye i:

- (a) Pa respekte ler travay pour plis ki enn oubyen de lokazyon dan en peryod douz mwan;
- (b) Pa raport travay plis ki enn oubyen de fwa dan en peryod douz mwan.
- (d) Absan dan landrwa travay oubyen kot son post pandan ler travay, san permisyon.
- (e) Pa obeir en lord oubyen lenstriksyon rezonnab ki anplwayer oubyen son reprezantan in donner.
- (f) Servi propriyete oubyen lekipman anplwayer ilegalman.
- (g) Koz propriyete anplwayer pour sibir domaz miner par neglizans.
- (i) Pa gard sekre ki konnekte avek son travay, fason ki bann prodwi i ganny fer, oubyen provizyon bann servis, kot i rekomande par lalwa oubyen regilasyon travay ki sa anplwaye i garde.
- (k) Pa obzerv lareg ek regilasyon ki anplwayer in mete.
- (l) Vin travay anba lenfliyans lalkol oubyen drog danzere oubyen konsonm lalkol ouswa drog danzere dan travay.
- (m) Donn fo lenformasyon par ekspre pandan lanket dan ka aksidan oubyen lofans disiplin dan travay.
- (n) Komet en lot lofans apard ki bann lofans disiplin ki serye ki'n liste anba.

15. Lofans Disiplin ki serye

En anplwaye i komet en lofans disiplin serye kan, san en rezon valab, i koz en lanpesman serye oubyen afekte travay ki son anplwayer i annan pour fer negativman, e pli partikilyerman, kan sa anplwaye i:

- (a) Pa obzerv ler travay oubyen absan dan travay san permisyon pandan trwa oubyen plis ki trwa lokazyon dan en peryod douz mwan.
- (b) Absan dan travay san zistifikasyon pour en zournen antye pandan trwa oubyen plis ki trwa lokazyon dan en peryod douz mwan;
- (d) Refize a plizyer repriz, pour obeir lord oubyen lenstriksyon rezonnab ki anplwayer oubyen son reprezantan in donner, an relasyon avek swen lekipman proteksyon.

- (e) Pa gard en sekre an konneksyon ek son travay, fason ki prodwi i ganny fer oubyen provizyon servis, e ki an rezilta i koz en lanpesman serye dan travay ki annan pour fer oubyen lentere zeneral larepublik.
- (f) Andomaz propriyete travay par ekspres, ki an rezilta i koz rediksyon oubyen menm aret prodiksyon oubyen koz en lanpesman serye dan travay.
- (g) Pa kapab desarz son responsabilite akoz lefe drog oubyen lalkol, ouswa refize pour pran en tes lalenn, lirin oubyen disan si anplwayer in rekomande.
- (i) Komet okenn lofans ki enkli dezonnekte, vol, mank konfyans, desepsyon ouswa lezot aksyon frod dan travay.
- (k) Atak oubyen enflikte okenn blesir lo en kliyan sa anplwayer ouswa lo en lot travayer pandan travay;
- (l) Pran okenn gous oubyen komet lezot aksyon koripsyon swa aktivman, swa pasivman;
- (m) Komet en lofans anba sa Akt kot sa travayer i koz en prezidis serye kont sa anplwayer oubyen travay ki i fer.
- (n) Komet okenn aksyon ki pa neserman i annan konneksyon ek son travay, ki reflekte seryezman lo lwayote ouswa lentegrite sa travayer e ki koz en prezidis serye kont travay sa anplwayer;
- (o) Montre en mank respe, ensilte oubyen menas en kliyan sa anplwayer oubyen en lot travayer, ki swa i en siperyer, en travayer lo en nivo pli ba oubyen en koleg;
- (p) Komet okenn aksyon ki ganny war koman persekisyon seksyel kont en kliyan sa anplwayer oubyen en lot anplwaye.
- (r) Pa arive delivre travay lo standar ek lakantite ki ekspekte dan kad sa travayer, san ki i annan en rezon valab.

16. Mezir Disipliner

Dan kad kot en lofans disiplin i ganny komet, nenport sa bann mezir disiplin swivan i kapab ganny aplike, dapre bann prosedir ki'n ekri dan Seksyon Lord Servis Piblik (PSO) ki apropiye.

- (a) En reprimann verbal oubyen warning – en Soupervayzer i kapab donn sa dan en ka ki pa tro grav, ouswa kan travay/konportman en travayer ki anba son kontrol pa satisfezan;
- (b) en warning an ekri;
- (d) dan ka kot en propriyete sa anplwayer in ganny andomaze oubyen in perdi, sa ki responsab i bezwen pey kou pour reaste oubyen repare;
- (e) dan ka labsans dan travay ki pa'n otorize, saler i ganny koupe; en anplwayer i kapab koup lavalal 3 zour lapey lo saler son travayer pour sak zour ki i mank travay san lotorizasyon. Si en anplwaye i mank travay san lotorizasyon en twazyenm fwa dan en lannen, i kapab ganny dismis;
- (f) Progresyon saler i kapab ganny sezi;

- (g) Transfer dan en lot seksyon;
- (i) Demosyon;
- (k) Sispann dan travay san lapey ziska 14 zour;
- (l) Dismis avek notis oubyen peyman dan plas notis;
- (m) Dismis san notis, savedir, dismis imedyat san konpansasyon;

17. Lofans Kriminel ki ganny soupsonnen

Kan Sekreter Prensipal oubyen Sef Departman i annan rezon pour krwar ki en anplwaye in komet en lofans kriminel ki serye, i devret raport sa ka avek Lapolis deswit pour zot aksyon. Kot i konsern pert fon piblik, provizyon oubyen lezot aki, prosedir ki merit swiv in ekri dan Lenstriksyon Finansyel (Financial Instructions) ki Minister Finans in sirkile.

PRENSIP SERVIS PIBLIK SESEL

Pour gard konfyans piblik

Zofisye Servis Piblik dan Sesel i merit azir toultan dan lentere piblik. Zot pa zanmen devret azir dan en fason pour ganny benefis finansyel oubyen materyel pour zot menm, zot fanmir oubyen zanmi.

Pour promouvwar lentegrite profesyonnel

Okenn Zofisye Servis Piblik Sesel pa merit plas li anba lobligasyon finansyel oubyen lezot lobligasyon ek bann endividi oubyen lorganizasyon andeor ki kapab sey enfliyans zot aksyon dan zot travay.

Pour fer desizyon obzektif

Letan zot pe fer bann travay piblik, ki enkli fer apwentman piblik, donn kontra oubyen rekonmann bann endividi pour kek rekonpans oubyen benefis, Zofisye Servis Piblik Sesel i devret fer bann swa obzektif ki baze lo merit e ki an akor avek kriter ki'n deza etabli.

Pare pour rann kont

Zofisye Servis Piblik Sesel i bezwen rann kont piblik rezon pour zot aksyon ek desizyon e zot bezwen aksepte okenn lanket ki apropriye pour zot lofis.

Pour maksimiz latransparans

Zofisye Sevis Piblik i devret ouver otan ki posib lo tou desizyon ek aksyon ki zot pran.

Pour evit konfli lentere

Zofisye servis Piblik i annan en devwar pour deklar okenn lentere prive ki zot annan an relasyon avek zot devwar piblik e zot merit pran ka pour rezourd okenn konfli lentere ki leve dan en fason ki lentere piblik i ganny proteze.

Pour demontre lwayote

Lwayote Zofisye Servis Piblik i merit an premye anver lepep Seselwa delivre atraver bann lenstitisyon demokratik gouvernman, e non pa anver endividi, parti politik oubyen okenn lorganizasyon partikilye.

Mon aksepte sa bann prensip totalman e mon pare pour obzerv zot. Mon pou siport e promouvwar sa bann prensip a tou moman par legzanp e koman en lider, koman parti mon komitman anver lepep Seselwa.

.....
Sinyen

.....
Dat